

四庫全書

史部

欽定四庫全書

史部

平定三逆方畧卷一至五

詳校官編修臣曹振鏞

編修臣裴謙覆勘

總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

史部三

平定三逆方畧

紀事本末類

提要

臣等謹案

平定三逆方畧六十卷康熙二十一年奉

詔修纂恭紀

平定逆藩吳三桂耿精忠尚之信事敬考

實錄以大學士勒德洪明珠李蔚王熙黃機吳正治

為總裁官內閣學士阿蘭泰達岱張玉書翰
林院掌院學士牛鈕為副總裁官其承纂銜
名則原書未載莫能詳也仰惟我

聖祖仁皇帝神武天授統壹寰宇是時平西王吳三
桂封藩雲貴平南王尚可喜封藩廣東靖南
王耿精忠封藩福建恃

恩驕恣日形跋扈康熙十二年因其自乞移藩

詔允所請逆謀既伐是年十一月三桂舉兵反直窺

湖廣乃

遣將馳赴荊州進據常德以遏賊勢復

簡八旗勁旅

命將總統隨機剿禦其明年三月耿精忠亦據福建

反而尚可喜子之信迫其父從賊可喜憤死

之信遂遙為煽附閩粵郡縣並時騷動於是

分

遣諸將

指授方畧撫剿並施以次戡定三桂旋伏冥誅逆孫
世璠尚踞滇中拒命而耿精忠歸正自請入
朝旋訊得其通賊反覆狀磔于市尚之信雖嘗歸正
而心懷兩端鞠實賜死廣東平逮二十年十
月大兵攻圍雲南省城世璠惶懼自殺其屬
悉以衆降乃戮世璠首獻馘京師雲南平用
兵甫八年三逆悉已掃蕩集勲之速

者定之隆亘古未覩也是編告成年月

實錄亦未載惟恭載康熙二十五年十一月

上諭閣臣曰爾等所進平定三逆方畧四冊朕已覽
畢其中舛錯頗多如王輔臣由雲南援勦總兵官
授為陝西提督今謂由陝西總兵官陞任至論贊
中援宋太祖杯酒釋兵權事吳三桂非宋功臣可
比乃唐藩鎮之流耳爾等其酌改之仰見是書纂

輯悉經

聖訓裁定詳慎成編是以紀事精審措詞簡括於以

彰

盛烈而昭萬世洵足媲美謨典矣當時未奉刊布僅

有寫本尊藏

大內今蒙

皇上宣示

特命繕錄編入史庫臣等校錄之餘既欣睹

聖祖仁皇帝實無守成創業之隆亦彌仰我

皇上觀揚

光烈之盛云乾隆四十八年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

平定三逆方略卷一

恭惟

皇上御極以來政教覃敷恩澤翔洽薄海內外罔不率
俾方偃戈衅甲以文德懷柔四方煦嫗生息
休養萬姓兼容并覆銷弭孽芽時二三藩臣
久分間於外使蕃錫予異數有加慮或怙寵
而驕盈深祿保全其終始因其乞骸之陳請

爰有勞還之

簡書處其田廬豐其廩餼道里芻秣之費悉戒於有
司俾歸故鄉長享第祿生民無饋餉之艱士
卒無遠戍之苦如天之福甚深甚厚乃滇逆
吳三桂背恩反叛閩逆耿精忠粵逆尚之信
相繼煽惑生民荼毒奄及八年當是時兇渠
陸梁鴟張豕突醜類蔓延蜂結蟻聚仰荷
天威赫濯六師四征戰守機宜悉從

指授三方竊踞次第削平三桂窮蹙首伏冥殛精忠
之信既降復謀叛先後皆伏誅獨三桂孽孫
世璠猶困守一隅逋誅逆命至康熙二十年
冬十月大兵平雲南世璠授首十一月露布
至

京師

上命宣捷午門擇日告

郊

廟

社稷

躬謁

列祖山陵

念中外軍民勞苦德音誕敷鴻恩湛被諸王貝勒大臣
暨外藩王等咸謂功德隆盛恭請上

尊號

皇上謙讓至於再三未之聽許御史臣戴王綰因疏言

皇上布昭聖武削平禍亂宵旰經營永清大定耿光威
烈曠古罕有請彙纂成書昭示無極疏入下
內閣翰林院集議以聞禮部尚書武英殿大
學士臣覺羅勒德洪等謹議臣聞歷代紀載
功烈俱有成書迄今可攷者唐興元間有紀
功述元和間有平蔡錄平淮記會昌間有伐
叛記宋建隆間有龍飛日歷天禧間有聖政
記熙寧間有經武要略明洪武間將征伐次

第彙為日厯藏之金匱彼或借箸臣下不皆
獨斷之功亦或蠱茲小醜有如摧枯之易猶
揭之簡策炳耀可觀豈若我

皇上神機獨運掃除大憝廸屢弗靖多方之衆降滅無
遺孽告厥成功八載之間纖毫無遺算師不
宿老方內又安至仁大勇巍巍超越前代文
之一怒武之七德罔不攸蕪於茲茲事體大
顧闕而不書雖

聖德高深而不自居觀揚於方將者或無以得其詳且
何以使萬世之為亂臣賊子者懼御史臣言
良是臣等昧死以聞

制曰可於是宣付史館歷次用兵以來平定方略自康
熙癸丑十二年三月始訖於辛酉二十年

康熙十二年三月壬午平南王尚可喜疏請撤兵
可喜世籍遼東明時為廣鹿島副將天聰八年
航海來歸

太宗皇帝招徠遠人不吝爵賞遂擢為總兵官崇德元年封智順王順治六年改封平南王率所部兵從大兵下廣東因駐廣州凡二十餘年頗能戢兵御衆奉職維謹子之信素桀驁動違禮法可喜初遣入侍繼慮其觸冒法網奏請還鎮乃之信暴橫日甚招納奸宄布為爪牙罔利恣行官民怨讟性嗜酒醉輒殺人常於其父前持刃相擬所為益不法至是可喜引年乞骸骨疏言臣自

奉

命鎮粵以來家口日蕃順治十二年曾具疏請解兵柄
部臣以地方未寧俟後議方令四海昇平臣年
已七十精力就衰正退耕隴畝之日伏念

太宗皇帝時曾賜臣以遼東海州及清陽堡等處地今乞
准臣仍歸遼東安插故土以資養贍計帶兩佐
領甲兵及老穉閒丁約二萬四千有奇沿途夫
船口糧請並議撥給疏入

上嘉其意報曰王自航海歸誠克殫忠蓋行間戮力平
定地方効力累朝功績茂著綏戢東粵鎮守巖疆宣
勞歲久覽奏年已七十欲歸遼東耕種情詞懇切具
見恭謹能知大體朕心深為嘉悅今廣東已經底定
王下官兵家口作何遷移安插戶兵二部會同確議
以聞部議東粵既寧應如可喜請於十五佐領內止
以兩佐領官兵家口遷居遼東但尚之信統兵
留鎮父子睽違且藩下將士皆昔與王共甘苦

兩地離析亦非所宜全撤之便疏下議政王貝勒大臣集議議與部臣同

詔從之兵部因言平南藩下綠旗官兵計六千有餘應仍留廣州令廣東提督臣統轄其一切夫馬舟楫俟開具人口馬匹確數及就道有期即遣官撥給

報可

七月庚午吳三桂疏請撤兵

三桂山海衛人父襄為明督理京營總兵三桂以父廕為邊將歷封平西伯鎮山海關流賊陷京城三桂按兵不動襄降賊以書招之三桂行至寶邸聞賊據其愛妾輒忿恨旋山海關密請我師時和碩睿親王多爾袞西伐師次翁後三桂迎降

命封為平西王隨大兵入關追剿流賊順治五年同將軍李國翰等至漢中駐鎮其地及金蜀既定隨大

兵平雲南尋進緬甸叙功封平西親王遂留鎮
滇後奏請文武官弁乞自選置既得請益驕蹇
縱恣陵轢命吏輒布其所私暱於要地不為用
者必阬之去治府第起園囿僭侈無等括明黔
國公沐民莊田悉為己有誑稱水西土司反叛
請攻滅之陽居拓地之切而陰擅其利諸水陸
衝要徧置私人權歛市貨因潛購硝黃諸禁物
又詭稱蒙古侵中甸邊境要挾軍需以示額餉

必不可減且日練士卒利器械陰蓄異志其舊
部將則陝西提督王輔臣貴州提督李本深四
川總兵吳之茂雲南總兵馬寶等時資給之倚
為心腹及可喜乞歸奏允三桂不自安乃具疏
請撤

上仍以溫旨答之曰王自歸誠以來克殫精忠戮力行
間功績茂著鎮守嚴疆宣勞歲久覽奏請撤兵安插
恭謹可嘉今雲南已經底定王下官兵家口作何遷

移安插戶兵二部確議以聞部議三桂及所部五十
三佐領官兵家口應俱遷移疏下議政王貝
勒大臣集議一議吳三桂鎮守巖疆宣勞歲久
戮力行間平定雲南今三桂既奏請撤兵安插
應將三桂并所屬官兵家口俱行遷移至於雲
南有土司苗蠻雜居且控禦西陲尤屬要地宜
遣滿洲官兵四千鎮守俟駐防官兵到日三桂
啟行一議三桂鎮守雲南以來地方寧謐若令

三桂遷移必須遣兵鎮守兵馬往來驛遞人民
定致苦累且土司苗蠻雜居其地若撥滿洲官
兵四千鎮守則力薄多遣則京城兵力又減應
不必令滿洲兵丁駐防仍令三桂鎮守雲南為
便奉

旨著議政王貝勒大臣九卿科道會同確議畫一具奏
諸王以下所見不一仍兩議上一議往以雲南
地方未定故令各省協濟兵餉使吳三桂等鎮

守令地方底定仍令各省協濟使其鎮守非永
久之計三桂久鎮巖疆戮力行間勞苦又具題
請撤安插應將三桂併所屬官兵家口均行遷
移若遣滿兵永行駐劄路遠人衆難以遣發若
不遣兵三桂遷移之時恐盜賊竊起應暫遣兵
戍守俟戍守官兵到日三桂啟行一議吳三桂
久鎮雲南地方寧謐令若將三桂遷移不得不
遣兵戍守雲南有土司苗蠻雜居若少遣兵則

力薄多遣則京城兵減且戍兵往來暨三桂遷
移沿途驛遞人民並皆苦累又戍守之兵係暫
時屯駐騷擾地方殆未可定相應仍令三桂鎮
守雲南可也奉

旨吳三桂請撤安插所奏情詞懇切著率領所屬官兵
家口俱行搬移前來其滿洲官兵不必遣發該藩起
行如有用滿洲之處該藩奏請時再行遣發於是兵
部言三桂所屬綠旗援勦左右前後四鎮官兵

萬二千人應仍留武定曲靖楚雄等府令督提
臣統轄

報可

丙子耿精忠疏請撤兵

精忠祖仲明遼東人明時為登州叅將天聰二
年航海來歸崇德元年封懷順王順治六年改
封靖南王偕尚可喜隨大兵下廣東道卒子繼
茂襲封駐廣州後移駐福建康熙十年繼茂卒

精忠襲封王爵軌縱其下為奸利奪農商之業
潛引海外私販肆行無忌大為閩人害又廣集
不軌之徒轉相煽惑及聞可喜奏允亦不得已
疏請撤兵得

旨王祖父以來世殫忠蓋戮力行間勞績茂著及王襲
封鎮守勞在巖疆覽奏請撤安插恭謹可嘉今福建
已經底定王下官兵家口作何遷移安插戶兵二部
確議以聞部議精忠及標下十五佐領官兵家口悉

應遷移復下議政王貝勒大臣集議議與部臣
同

詔從之兵部又言精忠所屬綠旗官兵七千餘人俱令
福建督提臣統轄

報可

臣謹按三桂等之初歸也或以私心被禍勢
急無聊或以海島孤窮志切攀附我

國家廣示招徠曲加撫納以羈旅異姓之臣授以顯爵

示用人之無方俾領其衆以屬戎行雖有微
勞凡啟疆闢土實惟我熊羆不二心之臣統
率禁旅以徂征於四方宣猷建績彼實無賴
屬邊陲甫靖使各留鎮撫其地自分鎮以後
志漸盈滿罔利漁民我

皇上遠覽前史深鏡歷代藩鎮之害念若屬久握兵柄
分駐巖疆殊為未便因其先後乞還遂

賜俞允惟時廷議紛出我

皇上不徇目前姑息之計收藩臣偏重之權
聖謨宏遠矣

八月壬子

命禮部侍郎哲勒肯等赴雲南戶部尚書梁清標等赴
廣東吏部侍郎陳一炳等赴福建

先是

上諭兵部邇因四方底定三藩各具疏請撤已允所請
地方應行事務及兵馬機宜必籌畫周詳乃為善後

之策應各遣大臣前往會同該藩及總督巡撫提督
商推作何布置官兵防守地方並料理該藩等起行
應遣官員列名具奏兵部尋具諸大臣名以請於是
命哲勒肯等各齎敕諭以行

御書賜吳三桂敕曰自古帝王平定天下式賴師武臣
力及海宇寧謐必振旅班師休息士卒俾封疆重臣
優游頤養賞延奕世寵固河山甚盛典也王夙篤忠
貞克據猷畧宣勞戮力鎮守巖疆釋朕南顧之憂厥

功懋焉但念王年齒已高師徒暴露久駐遐荒眷懷
良切近以地方底定允王所請搬移安插茲特遣禮
部侍郎哲勒肯等前往宣諭朕意王其率所屬官兵
趣裝北來慰朕眷注庶幾旦夕覲止君臣偕樂永保
無疆之休至一應安插事宜已勅所司飭庀周詳王
到日即有寧宇無以為念欽哉

賜尚可喜耿精忠敕畧同

九月丁卯朔

命陝西總督鄂善總督雲南軍務寧夏總兵官桑額提督雲南軍務

先是

上諭吏兵二部雲南遠疆該藩官兵既撤控制須人當特設總督一員添設提督一員責成專管可速議以聞議上故有是

命鄂善等未抵任後因三桂反道梗不得前改桑額為湖廣提督鄂善暫留湖廣軍前

命豫給三藩官兵俸餉

先是

上諭戶部三藩既撤其官兵家口安插地方並所需房屋田土等項俱應預期料理務令到日即有寧居以副朕體恤之意至是又

允戶部議三藩官兵家口起行之前預給俸餉六月其沿途夫船芻粟之屬仍俟報明撥給

十一月丙戌吳三桂反殺雲南巡撫朱國治

三桂素蓄異志陽請撤兵既

報可與其黨日夜謀益急踪跡甚秘數遷行期哲勒肯等既至趣之上道三桂慮謀久事泄遂於是月二十一日勒兵反執國治殺之哲勒肯等被留先是兵部郎中黨務禮戶部員外郎薩穆哈及戶部郎中席蘭泰兵部主事辛珠同至貴州為三桂夫船留揆備及三桂反黨務禮等聞之遂馳出貴陽赴京上變

李本深以貴州叛從賊雲貴總督甘文焜自殺

三桂既反偽稱天下都招討兵馬大元帥以明年甲寅為周王元年貴州提督李本深叛應之主事辛珠不及行與筆帖式薩爾圖俱不屈死文焜聞變倉猝出貴陽將十餘騎自隨日行數驛十二月初八日至鎮遠府鎮遠縣守將已應賊率兵圍之文焜度不免手刃其子遂自刎筆帖式雅圖華善亦自殺先是文焜與貴州巡撫

曹申吉以三桂反及本深從逆狀手書密報川
湖總督蔡毓榮毓榮調沅州總兵官崔世榮等
疾赴貴州守禦令彝陵總兵官徐治都永州總
兵官李芝蘭各率兵繼進更慮楚省兵單復檄
南汝總兵官周邦寧赴楚應援及文焜死申吉
降於賊賊兵遂逼鎮遠漸入楚境毓榮尋具以
狀

聞

十二月郎中李中黨務禮等還自貴州

命議政王貝勒大臣議出師

會議撥前鋒叅領前鋒侍衛前鋒兵各一半每
旗護軍叅領五員護軍校尉叅領九員每叅領
護軍校各一員每佐領護軍七名滿洲蒙古每
旗驍騎叅領一員每叅領署叅領一員散官二
員驍騎校一員每佐領撥什庫二名及兵共十
名漢軍每旗叅領一員每叅領署叅領一員散

官驍林校各一員每佐領撥什庫一名及兵共
五名議入

允行

臣謹按成周之法伍兩卒旅之衆寓於比閭
族黨之間為之長者則為之帥閒暇不忘講
武一旦有事即可從戎後世惟唐之府兵得
其遺意我

朝禁旅萃於八旗適符古法兵時

天子之親軍而將皆腹心股肱爪牙訓習有素部勒嚴明無事則兵歸於伍將歸於

朝有發則將皆夙儲兵已素練無簡稽召募之勞故三桂反書朝聞而調遣夕辦民方苦于塗炭望若雲霓而我師之馳驅捷於風雨賊欲掩我之不備我則疾出其不意以制之詩曰王旅嘽嘽如飛如翰此之謂也

詔停撤閩粵二藩台梁清標陳一炳等還

丁巳

命孫延齡為將軍以線國安為都統

延齡孔有德婿也有德為明登州叅將以天聰
七年航海來歸尋賜都元帥敕印崇德元年進
封恭順王順治六年改封定南王率師下廣西
後歿於軍無子有女四貞歸延齡延齡以有德
功為廣西將軍掌理定南王軍事延齡起家素
微庸劣無行能懾四貞威不敢抗藩下將士易

之又時擅殺人犯法都統王永年發其罪狀命大臣往鞠得實遂罷職及三桂反

上以廣西境隣貴州且重念有德舊勞特授延齡撫蠻將軍令統兵固守又以國安為都統以其素忠
鯁得軍心故也

調西安將軍瓦爾喀進四川

上諭瓦爾喀曰四川與滇接壤今雲南已反爾可率副都統一員悉領騎士選撥將領星馳赴蜀凡自滇入

川險要之地俱行堅守大兵不日進勦雲南俟我師
臨境賊勢漸分儻有可乘之機爾即與提督相機進
討至西安等處朕當刻期遣發禁旅前來駐防

臣謹按巴蜀乃滇黔之門戶逆賊豈無窺伺
之心顧尚有所未暇使我師扼蜀之險要進
可以取滇退可以守豈獨賊昨死不得入而
湖南之渠逆亦且孤疑狼狽徘徊前却蓋

廟筭深矣不意諸將師行少緩蜀變旋作關隴弗靖致

煩

天討益服

睿智之先見也

已未

命多羅順承郡王勒爾錦為寧南靖寇大將軍帥師討

吳三桂

先是議出師時

上命勒爾錦為帥多羅貝勒察尼都統覺羅珠滿鄂鼐

伯伊里布覺羅巴爾布護軍統領伊勒都齊額
司泰前鋒統領碩岱叅贊軍務并都統范達禮
王國詔副都統路什巴圖魯託岱穆舒渾布福
阿進泰肯齊赫蘇祐濟根特祖澤純宜思孝柯
曩趙賴等同往是日

上命給勒爾錦寧南靖寇大將軍印總統諸將

賜大將軍王暨貝勒大臣等袍服貂裘白金馬匹甲冑
有差出征將士及匠役等各加倍賞銀以示優

恤

庚申李株等謀叛伏誅

株等皆楊起隆黨也先是起隆詐稱朱三太子與株等陰相煽結謀不軌奸民多為所惑鑲黃旗監生郎廷樞家僕亦預焉事覺廷樞急赴公朝告變遣官兵捕治次第就縛惟起隆脫走事下法司訊據稱徒黨甚夥額皆裹白布身束紅帶為號約歲餘於內城舉事會先發謀遂阻李

株等相繼被獲至數百餘人法司以聞

上命勘情罪甚者論如律其餘從寬原釋於是法司將
李株等二百餘人咸論如謀反律寸磔其祖父
子孫兄弟及同居暨伯叔父兄弟之子皆斬籍
其家獄具

上曰陰倡大逆由李株等九人可論如律蔡文等一百
九十四人改斬至各犯親屬理宜按律收論但株累
過多朕心不悲槩從寬宥人口家產俱免入官

臣謹按當法司會訊時賊黨口稱謀叛姓名約有千人

上槩置弗問

神畿重地么麼蓄禍自干大戮而曲原污染咸與維新不嗜殺之仁洵卓越往古矣

命副都統瑪哈達領兵駐兗州科爾崑領兵駐太原

上諭議政王等大兵進攻楚蜀若須援兵自京遣發難以驟至且致士馬疲勞兗州地近江南江西湖廣大

原地近陝西四川均屬東西孔道苟發兵駐防秣馬
以待所在有警便即時調遣可令副都統瑪哈達駐
兗州科爾崑駐太原

臣謹按兵事莫善於佚而莫殆於勞

廟筭深遠命將四出以次相繼酌道里之均為濟師之
法緩則駐收警即遞進自時厥後調遣不絕
前者甫往後者復來師不宿老不疲勞應援
若神所向有功以至於大定多藉於此蓋數

千里之間運之若臂指而通之若呼吸自古
出師次第之方未有善於此也

辛酉

命直省巡撫仍管兵

直省各巡撫將副叅以下武職照舊管轄有總
督省分巡撫仍聽總督節制復設撫標左右二
營官兵

壬戌

詔削奪吳三桂官爵宣諭雲貴軍民

敕諭雲貴地方文武官員軍民人等曰逆賊吳三桂窮
蹙來歸我

世祖章皇帝念其輸款投誠授之軍旅錫封王爵盟勒山
河其所屬將弁崇階世職恩賚有加開闢滇南傾心
倚任迨及朕躬特隆異數晉爵親王重寄干城實托
心膂殊恩優禮振古所無詎意三桂性類窮奇中懷
狙詐寵極生驕陰圖不軌於本年七月內自請搬移

朕以三桂出於誠心且念其年齒哀邁師徒遠戍已久遂允奏請令其休息仍敕所司安插周至務俾得所又特遣大臣前往宣諭朕懷朕之待三桂可謂禮隆情至蔑以加矣近覽川湖總督蔡毓榮等疏稱三桂徑行反叛背累朝養之恩逞一旦鴟張之勢橫肆克逆塗炭生靈理法難容神人共憤今削其官爵特遣寧南靖寇大將軍統領禁旅前往撲滅兵威所至剋期蕩平但念地方官民人等身在賊境或心存

忠義不能自拔或被賊驅迫懷疑畏罪大兵一到玉石莫分朕心深為不忍爰頒敕旨通行曉諭爾等各宜安分自保無聽誘脅即或誤從賊黨但能悔罪歸誠悉赦已往不復究治至爾等父兄子弟親族人等見在直省出仕居住者已有諭旨俱令各安職業並不株連爾等毋懷疑慮其有能擒斬三桂頭獻軍前者即以其爵爵之有能誅縛其下渠魁及以兵馬城池歸命自効者論功從優叙錄朕不食言爾等皆朕

之赤子忠孝天性人孰無之從逆從順吉凶判然各宜審度勿貽後悔地方官即廣為宣布遵行先是

諭吏兵二部今吳三桂背恩反叛伊所屬文武人員有在直省居官吏閒住者或心懷疑畏致罹法網有負朕撫育好生之意伊等雖有父兄子弟現在雲南亦不株連自今以後伊等非復三桂所屬之人俱是朕之官民務使安心盡職毋滋顧慮爾部即通行曉諭

又

諭陝西總督哈占提督張勇王輔臣等逆賊吳三桂黨
有偽劄偽書潛行煽惑當曉諭官兵百姓令其舉首
上聞爾等皆朕擢任股肱之臣扞禦邊境綏輯軍民
惟爾等是賴其悉知朕意

命都統赫業為安西將軍帥師同將軍瓦爾喀等由漢
中入蜀

護軍統領瑚里布為副將軍偕署前鋒統領穆
占副都統延布率領官兵同往

癸亥遣前鋒統領碩岱率前鋒兵先赴荊州

上諭議政王等逆賊必犯湖南可先遣前鋒統領碩岱
領前鋒兵兼程馳赴荊州固軍民之心并進據常德
以遏賊勢

申明出師紀律

時

上覽兵部出師禁例謂立法尚寬再加嚴飭因

諭兵部曰遣發大兵原為掃靖叛逆以安百姓凡兵丁

廝役於所在地方恐有恃強掠民財物拆人廬舍壞
人器具污人婦女擾害生民及損壞運河閘板椿木
統兵主帥各宜體朕為民除叛用兵之意申明紀律
嚴加鈐束儻有違禁妄行從重治罪著即速行曉示
甲子外藩察哈爾和碩親王布爾尼等請率所部
從討賊

命回聽調遣

布爾尼及巴林部落多羅郡王鄂齊爾科爾沁

部落多羅冰圖郡王額濟音教漢部落多羅郡王扎木素扎嚕特部落多羅貝勒扎木等來朝元旦會聞吳三桂反爭請獻所攜馬匹助軍復有願率所部兵隨大兵進討者

上諭之曰吳三桂本為流寇所迫勢窮來歸之人朕推置心腹委以重任累進親王子為額駙恩養至此尚行反叛負國已極今已遣大兵進勦三桂雖反亦將安往朕與爾等俱同一體如有需用爾等之處可俟

金史四庫全書
卷一
春回草青時再聽調遣

平定三逆方畧卷一

欽定四庫全書

平定三逆方畧卷二

康熙十三年正月戊辰遣都統覺羅巴爾布護軍統領伊勒都齊額司泰率護軍驍騎先赴荊州

巴爾布等將行

上諭之曰頃侍衛阿爾賽自荊州馳還奏稱彼土隣境居民震恐爾等兼程馳赴能早至荊州則兵民可安然勿以行急致使馬疲仍宜酌量以行儻楚省告警

可簡肥馬速進俟到荊州之後即諸將領及綠旗官兵馬匹足供爾兵騎乘亦可保固地方矣時前鋒統領碩岱領兵已起行傳

諭亦如之

命副都統科爾崑移駐西安

先是科爾崑奉

命駐防太原尚未行至是

上以西安官兵既調往四川故有是

命隨

諭總督哈占曰今副都統科爾崑領兵將往西安俟將軍赫業等至漢中與將軍瓦爾喀同進四川如漢中必須守衛或令科爾崑之兵駐鎮或另行遣調爾可同科爾崑與西安副都統酌議以行尋又

諭將軍瓦爾喀曰朕思賊兵必犯巴蜀爾所部官兵為數無多應戰應守宜熟籌以行爾須兼程前進當即令將軍赫業瑚里布等率領大兵隨後為爾應援又

諭將軍赫業瑚里布瓦爾喀等京城所發官兵聽赫業
瑚里布統轄西路官兵聽瓦爾喀統轄兩軍會合時
毋得各分彼此致有不睦須同心協力以副委任之
意

癸酉

命提督桑額領兵援沅州

先是月朔總督蔡毓榮奏賊兵已抵清浪逼近
沅州亟請大兵馳救

上因諭毓榮及鄂善桑額等聞賊兵逼近沅州爾等前
曾屢奏已調遣兵官徐治都李之蘭等率兵應援何
至今未報到沅可速遣往督提俱在荊州沅州要地
豈可獨委總兵官崔世祿一人應令桑額領兵疾馳
赴沅協同固守蔡毓榮等亦宜酌量以行大兵不久
即至

臣謹按沅州為滇黔門戶堅守沅州賊可坐
困是時督提俱在荊州誠使分兵捲甲以馳

援世祿姑勿與戰而憑城據險過其闌出之路以俟大師之至人心益固而勢自倍矣

聖明洞鑒深以獨委世祿為失策已早知其有他變而沅州尋陷果如

上諭自是諸將稟

成謨無不捷而違則輒誤如神之智豈師武臣所能及
萬一哉

宣諭京師居民

上諭兵部近聞京城小民驚恐欲於城外西山處所遷
移逃避殊非朕撫安百姓之意前已有旨止令緝獲
假稱朱三之楊起隆與良民毫無干預並無驅逐居
民令移居城外之事即昨暫閉城門因有人舉首楊
起隆潛藏大城之內故行嚴緝非有他故爾百姓勿
妄聽訛言致生疑慮宜各安生業貿易居住如平時
爾部即轉行五城御史順天府宛大二縣作速刊示
通行曉諭

江南江西總督阿席熙請發兵援湖廣止之

阿席熙請調所屬官兵以備楚省告警即遣發
應援

上諭大兵不日抵楚兩省官省不必遣發江南沿海瀕
江甚屬要害俱應有備其江西水陸皆與楚閩接壤
尤宜固守阿席熙其飭令鎮將整頓兵馬於封疆扼
要所在加意偵探嚴防

臣謹按時閩逆尚未蠢動兩江晏然分其兵

以援楚似便而

睿慮周詳誠以江西密邇楚閩固不可以不豫防而江南財賦甲天下國用之所取資嚴兵以守所以安民心而壯軍實也厥後江西擾亂浙東亦弗寧而江南一隅獨屹立其間雖賊薄徽州旋即潰散民得免兵革竭其力於畝畝以佐公家而諸道之供億大半賴之豈非其兵足以衛民而不輕於調發之所致哉

廟堂神筭蓋相天下地利之所急而安定之於未然有

如此

乙亥大將軍順承郡王勒爾錦帥師之湖廣將軍
赫業帥師之四川

先是勒爾錦等將行

上面諭之曰行軍之要惟得民心為至要耳所過宜厚
加撫恤嚴禁侵掠誠能無犯及秋毫則百姓獲安矣
至吾兵士暴露良苦亦宜拊循其進止處所謹設斥

堦善自周防勿懈也南方卑濕念吾軍士遠役或不
能其水土猝有疾病可致良醫予善藥好護視之有
能立勲績者即向所司支給賞賚勿致踰時是日

上御太和殿內閣大學士捧

敕印授勒爾錦

勅曰茲以吳三桂背恩反叛煽亂雲貴爰發禁旅聲罪
致討特命爾多羅順承郡王勒爾錦為寧南靖寇大
將軍同多羅貝勒察尼都統鄂爾覺羅巴爾布覺羅

珠滿伯伊里布護軍統領伊勒都齊額司泰前鋒統領碩岱等統領官兵前往征剿凡事與貝勒察尼等酌定方畧會議而行其進剿事宜緩則奏聞而進如有急應進兵機會或有一路或應分路與衆商確進取仍將進兵情形具疏奏聞毋謂自知不聽衆言毋謂兵強輕視逆寇嚴加偵探毋致疎虞抗拒不順者戮之有先被賊脅從大兵一到即時迎降者俱免誅戮有能擒殺賊渠投誠者分別陞賞頒嚴禁兵將申

明紀律凡經過地方毋得搔擾百姓歸順良民加意
撫恤務體朕定亂救民之意其行間將領功績及重
罪俱察實紀明彙奏各官有犯小處當即處分至於
驍騎校護軍校以下無論大小罪過俱商酌徑行處
分收取雲貴勦蕩逆賊地方平地之後酌駐兩省要
地具奏候旨爾等受茲重任宜益殫竭心力蚤奏膚
功欽哉內閣學士捧

勅印授赫業

勅曰茲以吳三桂背恩反叛煽亂雲貴爰發禁旅聲罪
致討特命爾都統赫業為安西將軍護軍統領瑚里
布為副將軍同署前鋒統領穆占副都統延布統領
官兵由漢中府至四川會同將軍瓦爾喀等進剿緩
則奏聞而進如有急應進兵機會與衆商確即行仍
將進兵情形具疏奏聞凡事與將軍瓦爾喀署前鋒
統領穆占副都統延布會議而行毋執已見不謀而
動毋謂兵強輕視逆寇嚴加偵探毋致疎虞抗拒不

順者戮之有先被賊脅從大兵一至即時迎降者俱
免誅戮有能擒殺賊渠投誠者俱與分別陞賞須嚴
禁兵將申明紀律凡經過地方毋得騷擾百姓歸順
良民如意撫恤務體朕定亂救民之意其行間將領
功罪俱察實紀明彙奏有犯小過者當即處分至於
驍騎校護軍校以下除死罪外其餘大小罪過俱與
衆將商確徑行處分收取雲貴勦蕩逆賊地方平定
之後具奏候旨爾等受茲重任宜殫竭心力蚤奏膚

功欽哉勒爾錦赫業跪受畢

上親行告類之禮次祭旗纛畢還出西長安門王以下

副都統以上俱令乘馬馳而過

上目送之復遣內大臣禮兵二部大臣餞於郊外

己卯發察哈爾兵駐防兗州

副都統瑪哈達往駐兗州至是添發察哈爾前

鋒護軍驍騎兵往與瑪哈達同防守

庚辰

命大將軍順承郡王勒爾錦遣兵先赴荊州

總督蔡毓榮奏至稱賊于十二月二十九日陷
沅州總兵官崔世祿被執澧辰路梗楚疆危急
上覽奏令順承郡王於所領兵內每佐領先出驍騎二
名以都統一員率之繼都統巴爾布之兵速往
荊州并令都統巴爾布護軍統領伊勒都齊額
司泰等於所領護軍內簡選肥馬以護軍統領
一員率之繼前鋒統領碩岱之兵並馳赴荊州

命都統尼雅翰為鎮南將軍駐防安慶

調往駐兗州副都統瑪哈達俱往安慶其前發
兗州察哈爾官兵以副都統席布領之亦赴安
慶

癸未

命副都統根特巴圖魯駐防兗州

諭兵部宣諭湖廣軍民

時大將軍雲集楚省

上因諭兵部近因吳三桂背恩反叛已遣大兵前往征
勦聞楚省百姓有先驚避者輕離家室恐致失所朕
心深為憫念向來大兵紀律嚴明所過並無騷擾今
寧南靖寇大將軍啟行朕復面加誠諭務令秋毫無
犯安輯地方逆寇煽亂不過一隅大兵到日立見蕩
平該地方軍民人等俱係朕之赤子遣發大兵原以
衛民何必妄生驚恐著地方官廣行宣諭俾其各安
生理勿致流離以副朕定亂安民之意爾部即行湖

廣督撫提鎮等官通行曉諭

甲申調德州諸軍從將軍尼雅翰赴安慶

德州滄州及順義等十處駐防滿兵四百名調

集德州

命尼雅翰將之尼雅翰等尋奏請增兵竟往武昌俟王

師克定湖廣臣願率兵從廣西進取議政王貝

勒大臣集議令尼雅翰席布仍領德州等十二

處官兵往兗州與瑪哈達會兵分而為三擇馬

肥者尼雅翰席布領之先往安慶其察哈爾兵亦同往餘兵以根特巴圖魯領之防守兗州議入

報可尼雅翰臨授之

勅印令瑪哈達席布同預參贊軍務

丁亥

命江寧將軍額楚鎮海將軍王之鼎遣兵駐防安慶

侍衛舍塞自荊州馳還奏偏沅巡撫盧震棄長

沙奔岳州

上諭安慶居上游為江南要地令將軍額楚遣副都統
一員領滿兵千名由陸路往王之鼎於漢軍暨綠旗
兵內合選千名遣副都統一員酌領沙船由水路往
尼雅翰將德州滄州及瑪哈達之兵共選六百人速
抵安慶即以尼雅翰統之

命都統覺羅珠滿將兵速赴武昌

上諭珠滿聞巡撫盧震已棄長沙奔向岳州朕念武昌

重地不可不豫為防守爾可率兵急往如有賊至務期保固地方賊勢儻衆勿輕與戰或武昌無警即於岳州以北水路要地駐防又

諭大將軍順承郡王勒爾錦比聞長沙巡撫盧震棄城向岳州來朕念武昌為省會要地已令都統珠滿率兵急往防禦王將所部護軍每佐領撥一人連赴珠滿軍前王師抵楚後如武昌無事可與貝勒會同將珠滿之兵酌量調遣又

諭副都統瑪哈達侯將軍尼雅翰至兗州選兵去後爾將所餘官兵分領其半隨往江寧與將軍額楚同守其餘官兵留與叅領噶篤渾沙納哈仍駐兗州馬若疲瘦則向河漕諸臣辦取船艘星夜速往其馬仍由陸路前去毋至遲緩

戊子

命副將軍瑚里布等速進四川

先是

上諭瑚里布署前鋒統領穆占爾等率領前鋒護軍兼程疾赴西安或軍中馬有疲乏者即取西安綠旗官兵馬匹馳行儻更不足取滿洲官兵馬匹即以爾等所留馬補給之可追及將軍瓦爾喀繼進四川與瓦爾喀合兵之後何處設防何處駐劄爾等相機區畫如有可進雲南之機必俟將軍赫業定議以行至是四川巡撫羅森遣人奏言蜀省軍心頗懷攜貳上恐有意外之虞隨令瑚里布穆占輕騎速進并

諭赫業瓦爾喀副都統佛尼勒等大兵進川之後宜一切加意嚴慎勿得玩忽其軍中行止當謹嚴弁堠勿墮詭計又

諭總督哈占以秦中綠旗官兵當拊循得宜更加鼓勵兵將保障地方

命海澄總兵官馬化麟提督四川軍務

時四川提督鄭蛟麟補授鑾儀衛使以化麟代之尋以道梗不得進

命暫留荊州軍前

申諭京師居民

上諭兵刑二部近自逆犯楊起隆詐稱朱三煽惑愚民
潛謀不軌其黨相繼緝獲俱經審明重者正法其株
連者業行省釋除首逆楊起隆張子房金玉環鄭得
勝仍嚴緝務獲外其餘黨與槩從寬免緝以後著改
行從善恪遵法紀勿得自干憲典軍民人等俱宜各
安生業不得聽信訛言自生疑懼旁人亦不得妄行

搜拿首告借端嚇詐擾害善良爾二部即出示通行
曉諭

己丑前鋒統領碩岱兵抵荊州

命副都統佟國瑤為鄖陽總兵官

上諭兵部鄖陽地介三省中多曠土山谷扼塞姦民易
於嘯聚恐有竊伏其間與賊應和者又逆賊或乘間
侵犯令副都統佟國瑤為總兵官駐防彈壓

臣謹按鄖陽地曠而險

皇上洞悉形勢設使置鎮使三省犬牙相錯之區屹然
有重防所以洪福後雖內叛尋至奔逃賊始
終不敢窺郛况荆襄有屏蔽之勢雲夔有控
制之形具資捍衛者更大也

鄭蛟麟譚洪羅森吳之茂以四川叛從賊

時陝西總督哈占奏至稱四川總督鄭蛟麟與
川北總兵官譚洪合謀反叛洪為偽川北將軍
蛟麟為偽總督將軍川湖總督蔡毓榮尋亦馳

奏四川巡撫羅森總兵官吳之茂背恩從賊聲
言兵一出漢中一下夔州隨調尋陵總兵官徐
治都仍回原汛以備不虞

庚寅

命都統席卜臣為鎮西將軍往守西安

上諭議政王等大兵進剿四川秦省為接壤要地其授
都統席卜臣為鎮西將軍接濟大兵保守西安等處
令副都統巴喀德業立偕往

命原任浙江總督趙國祚提督江南軍務阿思哈尼哈
番王永譽提督河南軍務

時江西河南各增設提督一員以資調發應援
故也

辛卯遣近侍納爾泰至荊州

時

上命納爾泰傳

諭總督蔡毓榮鄂善提督桑額等近所屬地方雖有淪

陷爾等不必懷憂朕聞爾等戮力共保荊州甚為可
嘉俟王師之至恢復疆宇是即爾等之功前鋒統領
護軍統領續當即至或馬匹疲瘦可以馬助之芻茭
之屬豫儲勿悞

提督桑額總兵官馬邦寧領兵赴常德

壬辰錄用拔誠官兵

上諭兵部各省拔誠官兵有堪効力者准入督撫標下
量材錄用

命副都統科爾崑領兵赴漢中

兵部奏先奉

上命副都統科爾崑兵駐防西安令鎮西將軍席卜臣
已奉

命往西安行守科爾崑之兵應前往漢中并遣漢軍副
都統吳國禎率領漢軍每佐領兵二人以益科
爾崑之兵自後繼進

上從之又

諭將軍瓦爾喀副都統佛尼勒爾等久歷戎行素稱諳練朕可無西顧之憂但大兵至蜀或綠旗已叛官兵或吳逆偽屬官兵有來降附者隨宜撫納仍應密為防閑其嚴設巡哨整飭營壘爾等自能周知無庸再諭兵部郎中託必泰前奉使往蜀今鄭蛟麟既叛度必羈遲不還爾等或令人持書往諭大畧言爾雖反叛朝廷猶念從前効力著有成績一時出於迫脅固不可知爾在京子孫家產並未按法收繫可將託必

秦速行遣還否則大師壓境克復城池將悔莫及矣
至綠旗兵叛官兵相機招撫在爾便宜行之

平定三逆方畧卷二

欽定四庫全書

平定三逆方略卷三

康熙十三年二月乙未朔

宣諭長沙官吏

時賊勢逼近湖南長沙人心搖惑

上命吏兵二部傳諭長沙諸處文武各官逆賊吳三桂
虛聲恫喝以致巡撫盧震棄地潛逃已行拏究湖南
文武各官仍能保久百姓固守地方久稱盡職事平

之日從優加恩

護軍統領伊勒都齊兵抵荊州

丙申護軍統領額司泰兵抵荊州

戊戌

命給王輔臣世職

輔臣本秦人少年無賴從姜瓖為部將同瓖反
王師逼大同殺瓖來降隸於英王後没入正白
旗下

世祖皇帝聞其壯健留為侍衛經畧洪承疇往湖南令從
征所在多戰功授總兵官尋由援勦總兵官陞陝
西提督是時遣其子繼禎至京首逆劄因

命給三等精奇尼哈番併授其子繼禎為四品京官

庚子都統覺羅巴爾布兵抵荊州

甲辰將軍席卜臣帥師之西安

乙巳

諭都統覺羅巴爾布守常德覺羅珠滿守長沙

上諭巴爾布及護軍統領伊勒都齊額司泰前鋒統領碩岱等常德為水陸衝要之區不可不預加防守大將軍兵未至之先宜令護軍統領一員率每佐領護軍一名同碩岱率前鋒兵盡移赴常德謹守地方巴爾布并所留護軍統領率兵暫駐荊州俟大將軍兵到後即進守常德如巴爾布至常德其先往常德之護軍統領可即移鎮長沙與都統珠滿合兵俱聽王指揮朕遙度兵勢似宜如此爾等身在地方倘勢有

難行仍當相機調度不必固執慮違朕命又

諭珠滿及副都統阿進泰肯齊赫等前諭爾等統兵鎮
守武昌岳州茲念長沙乃武昌咽喉之地又為武昌
寶慶州郡水陸要途且壤連粵西爾等若進駐長沙
既兼防水陸之衝更可壯粵西之勢俟大將軍兵抵
荆當即遣護軍統領一員往助爾等協同防禦爾等
啓行之日可即聞之巴爾布等並移檄廣西將軍提
撫諸臣言我兵已抵長沙保固湖南爾等當各守疆

土朕遙度兵勢似宜如此至軍中情形或有難行仍當相機調度不必固執慮違朕命是日

諭兵部逆賊吳三桂反叛聞警之初即調總兵官徐治都守常德旋復撤回彞陵徐治都能久捍危疆可嘉事平之日及所屬將弁該部一併議叙其標下兵丁扼守要地往來奔馳殊為勞苦着總督蔡毓榮酌量加恩賞賚

臣

謹按常德長沙扼湖湘之險當水陸之衝

堅守以挫賊則全楚之勢俱在我矣

聖謨區畫瞭若指掌苟是時守臣能戮力固守以待大兵旦夕之至而已爾珠滿等受

命疾驅以赴其急援兵集而人心固賊雖闌出沅州而前有堅城頓兵疲敝進退狼狽旋必潰亡祇由盧震先奔楊過明內叛人心已搖而兩將之援軍復逡巡而不進二郡坐失而岳州尋亦陷宿師幾年然後收復於此益服

金史紀事本末
卷三
宸衷先事之謀扼要制勝詳密而深固也

丁未

命將軍尼雅翰帥師赴武昌

初原任廣東提督楊遇明素與三桂有舊以老
乞休攜家寓常德其子寶應任雲南知府及三
桂反授寶應為偽總兵以兵犯常德遇明內應
知府翁應兆從之常德遂潰總兵蔡毓榮以

聞

上隨諭前往安慶將軍尼雅翰於所領兵內簡選壯騎
並前調江寧京口副都統二員兵二千名一併前赴
武昌長沙等處與都統珠滿會商而行兵馬各自統
轄尼雅翰仍帶將軍印餘兵令副都統席布領之仍
駐安慶以待護軍到日牧養馬匹其京口副都統所
領船艘令尼雅翰酌量帶往武昌席布所領護軍驍
騎亦量留與船艘

臣謹按先是預遣重兵雲集安慶據上游之

勢扼長江之險故雖武昌兵單湖南震動而
安慶之師朝奉調發可以夕赴無鞭長不及
之慮無遠征勞頓之苦且在金陵者旦夕可
以移鎮安慶在兗州者旦夕可以移鎮金陵
數千里之間星羅棋布于以見

廟謨之深遠焉

已酉都統覺羅珠滿兵抵武昌

尋湖廣巡撫張朝珍疏至言常德水陸四衝為

我兵必爭之地今荊州已宿重兵岳州尤當固
守庶可兼顧長沙以通粵西聲息又可捍蔽省
會以壯長江上游更可與荆澧犄角為進逼常
德之勢宜急措置以固要地

上以都統珠滿頃遣往長沙今既抵武昌又調將軍尼
雅翰領兵繼往會商機宜如尼雅翰未至聽珠
滿于岳長二府擇要固守

壬子總督蔡毓榮奏提桑額等領兵回荊州

毓榮奏本月初八日吳三桂兵至澧州方渡河
澧州城守官兵以城叛應賊提臣桑額鎮臣周
邦寧自常德還至州城外孤軍不能迎敵不得
不退回荊州乞大兵星馳勦禦

甲寅

命都統覺羅巴爾布進兵湖南

當澧州未叛時巴爾布奏稱臣與護軍統領伊

勒都齊額司泰前鋒統領碩岱率兵以次抵荆

州探聞賊陷沅辰常德繼叛四川全省又變提督桑額尚在澧州屢請大兵救援臣等隨發前鋒護軍二百人赴澧駐防今不難進取常德但恐既得之後守城則乏芻糧守江又無舟楫況聞川賊將犯荊州若兩地兵分則勢力亦分雖取常德終屬無濟故臣等會議暫駐荊州牧馬俟大將軍王到日舉師齊進至是總督蔡毓榮奏稱長沙副將黃正卿參將陳武衡以城叛降

賊

上諭大將軍順承郡王勒爾錦前都統巴爾布護軍統領伊勒都齊額司泰等率兵已于二月初旬早抵荊州是時常德澧州尚未有變理應稍休馬力速赴常德以戢兵民乃遲久不前以致常德相繼皆陷近聞長沙亦有變可俟都統鄂爾等兵至荊州令其鎮守荆彝諸處即令巴爾布等進兵攻取常德以定兵民之心其鄂爾所領漢軍併趨赴荊州又襄陽為我師

來往之衝蜀寇必窺之地在王軍前漢軍都統副都
統可酌率漢軍官兵留鎮襄陽先是

上諭勒爾錦近聞常德已叛四川夔州所在賊氛甚熾
都統巴爾布兵力雖盛倘須兩路堵剿更宜增兵王
可于所率驍騎內揀擇肥馬每佐領撥二三人每翼
以副都統一員領之速赴荊州巴爾布軍前若不得
肥馬難于前進聽王酌量以行

乙卯

宣諭廣西將帥

上諭廣西將帥孫延齡都統線國安巡撫馬雄鎮提督
馬雄等保固粵西寶爾等是賴今大師已抵武昌倘
賊犯武岡寶慶長沙諸處爾等率所部官兵追勦其
後大兵迎擊于前量此逆醜自可尅期撲滅以朕遙
度自宜如此爾等身在地方必有確見宜同心協力
謀定後舉以赴朕倚任至意事平之日自將帥以至
卒伍皆當不吝重賞凡有機密軍情可啓寧南靖寇

大將軍及武昌所在各將軍都統軍前彼處如有軍機亦令與爾等知之

已未大將軍順承郡王勒爾錦奏分官兵防守襄陽

勒爾錦奏稱臣等行至彰德據護軍統領伊勒都齊等報稱常德已反賊兵自蜀道直抵巴東臣恐襄陽危急隨令都統鄂爾并每翼兩副都統率每佐領驍騎三人漢軍二人馳赴襄陽防

守及接

上諭即令鄂爾速至襄陽偵探鄖陽一路情形如鄖陽
無警即令兩副都統率每佐領驍騎二人逕往
荊州都統巴爾布軍前疏入

上又諭勒爾錦曰襄陽總兵官楊來嘉向自海上投誠
其才甚庸所屬官兵率皆藐玩將來慮有他故可將
漢軍官兵留鎮襄陽即以此意密諭之但不必防閑
過甚恐致漏洩以速其變

庚申

申諭大將軍等嚴禁兵士侵擾百姓

上諭兵部前大將軍王貝勒將軍大臣等出師之時曾
經面諭凡大兵所到地方毋得苦累百姓肆行搶掠
侵及婦女各令嚴加禁飭諄諄告戒不啻再三近恐
無知之徒不遵紀律擾害良民其速行順承郡王貝
勒及各路將軍大臣等凡經過處所兵丁廝役不得
私離營伍致犯民間秋毫有違禁者統兵主帥即行

從重治罪并移檄各督撫凡出兵之地或有此等擾
民者聽指名叅奏若兵主以及將領不加嚴束以致
妄行騷擾該督撫知而不叅事發得實將兵主將領
即行議處并治該督撫以瞻徇之罪應各令督撫刊
示廣行傳諭

臣謹按前者出師之始

上之申明紀律已加嚴矣至是曾無幾時復諄切戒諭
蓋愛民之心無刻而不惓惓也至懲將帥以

故縱之罰予督撫以叅奏之權中之大法以
曲用其仁心可謂至矣厥後禁兵之調發相
屬必儆之以民生之不易軍行之或不戒欲
俾無犯秋毫所過如時雨蓋

皇上之心如天地之澤物風露雷霆而生機未嘗一日
不流行也如父母之愛子噢咻長養而疾痛
慘怛未嘗一日不在已也母論良民皆吾赤
子固聞聲而感泣即其陷賊中者不能自拔

皆延頸企踵以望王師故永清大定若易然
也格天心孚民望實本於

皇上愛民之一心矣

命都統覺羅珠滿守岳州

上諭珠滿一等侍衛畢桑阿來奏爾稱馬匹稍肥即往
岳州防守甚善岳州乃水陸衝要之地宜亟固守今
將軍尼雅翰等率領沙船水陸兼行以備應援爾等
前往岳州並趣尼雅翰等速行又

諭都統覺羅巴爾布畢桑阿來奏爾等曾言岳州參將
難于信任且兵力單弱請遣提督桑額總兵官周邦
寧往岳州防守今度桑額周邦寧前去已遲可將偏
沅巡撫韓世琦軍前遊擊哈什庫即充岳州參將選
綠旗兵速往岳州

臣謹按湖南初警

皇上即命將率師防守岳州蓋岳州據洞庭之險若賊
竊踞以為巢穴難于驟克且平湖巨浸舟楫

易通賊踞岳州則武昌亟資防禦所以逆寇稽誅數載由諸將畏縮岳州失守之故也

皇上固已洞悉之于始及後趣兵進攻已入洞庭諸將猶以風濤險惡請暫退師

詔旨嚴切不許却尺寸迨至收復岳州捷書一聞而師行遂有破竹之勢六年逋寇不數月而薙獮殆盡益知形便之地為兵家所必爭

聖明先事之防與善後之圖即遙度而皆如親歷固非

諸將所能窺萬一也

辛酉

命刑部尚書莫洛經畧陝西

上諭吏兵二部陝西邊陲要地西控番回南通巴蜀幅員遼濶素號巖疆茲逆賊吳三桂煽亂滇黔四川從逆秦省地處鄰封恐有奸徒搖惑以致人心不寧雖有督撫提鎮等官各盡乃職但軍務繁重必須需遣大臣假以便宜相機行事方可綏靖中外保固邊疆

刑部尚書莫洛前任秦督深得軍民之心諳曉地方情形茲特授為經畧率領滿兵駐西安與將軍總督會同措置巡撫提鎮以下悉聽節制兵馬糧餉悉聽調發一切應行事宜不從中制文武各官聽其選用吏兵二部不得掣肘鄰省用兵當應援者酌量策應如有軍機將軍總督領兵以行俟湖廣四川地方底定即命還朝應兼職銜及應給勅印爾二部會同速議具奏及議上

命加莫洛武英殿大學士仍以刑部尚書管兵部尚書
事兼都察院右副都御史

賜之勅印

宣諭直省人民

上諭戶兵二部逆賊吳三桂心若虺蛇行同梟獍負恩
謀叛倡亂害民當明季闖寇入京三桂勢窮來歸我

世祖章皇帝念其投順優待有加寵以王爵託以腹心嗣
大兵克復黔滇巖疆初定令其移駐防禦界以事權

及朕即位以來推誠益至題授兩省官職聽其選擇
給養家口兵丁歲費不貲且欲其感恩知報特加親
王人臣之分已極委任之專無比乃去年伊自具疏
求歸故土朕憫其久在邊遠勞於戎事年已衰殘欲
令其父子祖孫得以完聚准與遷移遂其所請復為
之區畫房地資給行糧眷念體恤委曲周至詎意包
藏禍心久蓄不軌陽報起程日期遽乃擁衆倡叛蹂
躪百姓竊踞城池散布偽劄妄為聲勢以致鄰近州

縣無知之徒被其煽惑又復假造訛言潛行傳布以
冀搖動愚民種種狡謀悖天蔑理即屢次發兵朕皆
嚴諭將帥令體朕軫念斯民至意務期秋毫無犯無
非欲救濟百姓安輯地方今寧南靖寇大將軍王等
率領大兵各路進剿不日殲滅以正天誅三桂反覆
亂常不忠不孝不義不仁為一時之叛首實萬世之
罪魁行即懸首藁街以洩神人之憤猶恐小民未悉
其由輒相驚疑不察虛實妄行聽信立意一差如蹈

陷穽邪正之介即禍福之關身家性命所繫不小朕不忍赤子悞罹法網有傷天和爾部即傳諭直省督撫刊刻告示轉行所屬各州縣遍諭百姓俾各安生業勿聽訛傳以副朕保全元元之意

孫延齡反執廣西巡撫馬雄鎮

延齡乘滇黔煽亂心懷異圖又因都統王永年
前發其過惡銜之特甚至是將稱兵先執永年
殺之并殺副都統孟一茂等發兵圍巡撫馬雄

鎮署據守陽朔大榕溪隘口桂林自此不通三
月初七日兩廣總督金光祖以其狀奏

聞

命陝西督撫協理四川大兵糧餉

上諭戶部蜀地人民稀少大兵所至艱于供億陝西與
四川接壤餽運為便令陝西總督巡撫與四川總督
協理供應

癸亥

命副都統根特巴圖魯席布移兵江西

江西巡撫董衛國疏言袁吉二郡與長沙接壤
兵單勢孤請就近速發勁兵以資彈壓

上諭江西一省東接福建南界廣東西通湖廣為三省
要地今前往兗州副都統根特巴圖魯前往安慶副
都統席布率兵速赴江西省城原駐江寧副都統瑪
哈達將自京所帶甲兵移駐安慶其察哈爾左右兩
翼官兵於兗州秣馬之後左翼官兵赴江寧聽江寧

將軍統轄右翼官兵赴安慶聽瑪哈達總管

臣謹按時閩粵雖未動搖而包藏禍心已久
得此重兵于江西彈壓遂使賊勢阻絕厥後
三逆各困一隅不得連結披猖首尾相應實
賴此舉以扼其吭也

調真定總兵官張和善協守武昌

上諭兵部駐守武昌滿兵既往岳州長沙其防守南汝
之真定總兵官張和善即領官兵赴武昌協守念軍

士自真定調赴河南今又遣往武昌實為勞苦令各
以白金優賚之

平定三逆方畧卷三

欽定四庫全書

平定三逆方略卷四

康熙十三年三月乙丑朔

命諸路設筆帖式馳遞軍情

時

上以軍興孔亟驛遞奏報若如常期或悞軍機特令兵部每四百里置筆帖式一員撥什庫一名以速郵傳自京至荊州設筆帖式七自河南鄭州至

武昌設三自直隸真定至漢中設十遇有緊急
軍務星馳接遞遲者以違誤軍機治罪尋又

諭兵部江西驛路近為衝要亦應設筆帖式馳遞自南
昌至京計十一程每程置筆帖式一員遇有警晝夜
馳遞

臣謹按兵貴神速往昔羽書旁午皆從驛傳
別無他策可使疾迅我

皇上睿畧非常特於驛遞之外別設官以備馳驅往來

奏報每一晝夜可行千餘里且互相更代事
無稽悞人不疲勞諸將雖遠在軍中而稟承
廟算恒如在几席之前

聖謨區畫

尺一所傳亦星馳電擊於數千里之外故能決機制勝
削平巨憝用秦膚功郵傳之速其有裨於軍
機者大矣

都統鄂鼎兵抵荊州

丙寅暫停廣東裁兵

廣東經制額兵七萬六千八百二十人康熙八年議裁一萬二千八百二十人除汰過外尚有未裁兵六千餘至是

上諭兵部粵東海疆幅員遼闊未裁之兵仍留之以資守禦

丁卯

命都察院左都御史多諾兵部侍郎勒布內閣學士李

仙根往荊州督理大兵糧餉

時諸臣往

賜之勅印

勅曰茲以滇黔煽亂大兵進剿軍需浩繁職任重大必須專官綜理始克允濟特命爾多諾總理大兵糧餉撫民事務勒布李仙根協理大兵糧餉撫民事務凡大兵所到之地備辦糧餉支給如遇轉輸不便處所與兵主王將軍等會同商酌以行督撫以下大小各

官有能不苦累百姓不悞糧餉者許爾等題叙獎勵如有苦累百姓稽遲糧餉者即行題參議處支給大兵糧餉酌量辦理解運糧餉酌量取調官兵護送其辦理兵餉地方官如致遲悞護送錢糧官兵或不如數遣發或護送有怠玩之處應題參者即行題參應治罪者即行治罪仍綜核錢糧出入嚴察虛冒招撫土著大兵經過地方流離百姓務令得所兼理湖廣等處地方驛遞事務勅中開載未盡事宜聽爾便宜

區畫爾等庸茲重寄須持廉秉公攄忠殫力俾軍儲
充裕驛站無稽民生乂安地方綏靖斯稱委任如因
循怠忽或措置乖方致悞重任責有所歸爾等慎之

庚午

命和碩額駙華善為安南將軍帥師鎮守京口

副都統馬思文楊鳳翔內閣學士薩海同往諸

臣瀕行

召入內廷

上面諭之曰茲以京口地當要害特遣爾等率兵往鎮
雖駐其地儻傍近有警亦宜應援軍行往來與駐防
之地務嚴禁軍士勿得擾民間前者兵行所過率多
擾害爾等當以為戒否則罪有所歸

壬申

諭大將軍順承郡王勒爾錦及諸將等進兵

上諭勒爾錦等曰朕覽都統巴爾布護軍統領伊勒都
齊額司泰前鋒統領碩岱等奏皆云以八月間進兵

恢復疆土朕思雲貴尚未可輕進必俟四川全定之後方圖進取但湖南地界南連粵西東抵江右安慶近長沙副將又已降賊兵船盡為賊有今惟當相機速取常德以斷長沙後路使賊彼此不及應援更以將軍尼雅翰都統珠滿等統兵進逼長沙則長沙之賊非來降即棄城遁矣如此則賊膽自落百姓早得歸耕於我進取雲貴之師誠大有裨益也若不急行攻取使賊勢漸增妨民稼穡我兵深入芻糧轉運區

處倍難據理揆度如此兵在千里之外豈能遥為指
示但民心業已動搖廣西音信又隔儻江西更有賊
警勢必遣發禁旅不惟饋餉浩繁且恐兵民之心又
生叵測爾等前出師時止言進取雲貴之期不過八
月耳今賊猶未至而已叛之長澧常德諸處乃亦欲
待之八月設各處再有變者王將分兵以討否乎分
之則兵單以次撲剿則馬疲矣為今之計惟先取常
德長沙以寒賊膽方為制勝王宜集衆議以行又

諭曰此聞逆賊吳三桂身至常德王所統兵馬稍加休
息進取常澧之時狡寇知不能敵或出全力冒死以
犯岳州武昌未可料也王若進兵當密示將軍尼雅
翰都統珠滿各於所往之地酌其近遠約定行期共
圖前進庶幾萬全其荊州武昌兩地軍機互相關白
務宜回顧武昌王等仍相機以行尋巡撫張朝珍奏
至稱吳三桂兵水陸齊進將犯岳州密遣賊二
人潛入州城叅將李國棟私行納款

乙亥大將軍順承郡王勒爾錦帥師抵荊州

庚辰耿精忠反執福建總督范承謨

精忠素庸劣然好亂樂禍又為三桂煽惑見湖
南用兵有異志謀據福建是日紿總督范承謨
會議軍事至則執之遂舉兵范承謨罵賊不屈
賊幽之巡撫劉秉政從賊杭州將軍圖喇以是
月三十日奏

聞

甲申

命諸臣薦舉人材

上諭吏部大兵進剿逆賊指日蕩平地方恢復之後即應設官撫綏民生料理事務項以需人甚急已將漢軍堪用人員照該督撫所請發往軍前候用其漢人中素有清操及才能堪任繁劇者不拘資格著漢官大學士以下三品堂官以上據實保舉發往軍前與漢軍官員一體并用務期虛公舉薦有裨地方以副

朕廣攬人才之意

命副都統根特巴圖魯等援吉安袁州提督趙國祚駐

防南昌

巡撫董衛國疏稱長沙張夏二賊欲犯江西袁
州吉安地方有累卵之危請

勅江南江西總督及防守江寧諸將領大兵速赴江西
相機剿守

上諭副都統根特巴圖魯現駐南昌若袁州吉安有警

即率領滿漢官兵勦禦長沙有可乘之機亦相機以
行根特已圖魯前往則南昌空虛可慮令提督趙國
祚即率官兵駐防

乙酉大將軍順承郡王勒爾錦奏官兵敗賊於彝
陵

時逆賊萬餘水陸齊犯彝陵於江兩岸各列五
營是月初四日官兵奮力擊敗之獲其船賊遁
回宜都是日勒爾錦奏

聞

壬辰

命內大臣希爾根為定南將軍禮部尚書哈爾噶齊副
之帥師赴江西

護軍統領桑格叅贊軍務吏部侍郎舒恕署前
鋒統領及先遣往江西副都統根特巴圖魯席
布亦同叅軍務

總督蔡毓榮奏楊來嘉叛於穀城

襄陽總兵官楊來嘉於是月十五日叛欲挾穀
城官兵遁入西山調南漳遊擊李文忠會兵代
池文忠不從具文申報毓榮以

聞

上嘉文忠授以副將職銜

定綠旗官兵賞格

先是

上諭兵部凡綠旗官兵効力行間立有破敵功績者理

應議叙給與官職賞賚

部臣遵

旨議凡綠旗官兵攻城克敵等功除已有定例議叙外如陣亡殉難官員自千總至兵丁例給卹銀而提督以至衛千總向未議及其大小各官俱准蔭子弟而千把總微弁不與嗣後照級高下俱准給卹銀與蔭又如大兵所至之處或敵人堅壁相拒或大列陣勢相迎有能挺身先登以及

越衆衝鋒者各依論功次第授以守備千把總等官至如先躍敵船立功者各依船大小等第授以都司僉書守備千把總等官並各給賞銀有差以示鼓勵議上

從之著為令

諭都統覺羅巴爾布護軍統領伊勒都齊速赴武昌

時武昌有警故令巴爾布伊勒都齊以文到日

速赴武昌

甲午

命副都統李林隆領兵赴襄陽

林隆率漢軍官兵赴襄陽同都統范達禮協守
令達禮總統如鄖陽等處有警達禮即酌量應
援

將軍瓦爾喀奏克陽平關

時逆賊萬餘竊踞陽平關布列營伍設伏守險
是月十八日瓦爾喀同署前鋒統領穆占等率

官兵進勦自野孤嶺直抵陽平奮勇衝擊擒斬
賊衆三千有餘復取陽平關及三寨

平定三逆方畧卷四